

Nsân saba cir kaplãn

¹ -Ye yãŋ, kai- nkãy tẽ ga yar ye na, ke wii wĩĩ pãã tuu cãã pye wa kai- bye fegbecãã yaha. Woo kẽ Yãhã Dya Yesu Crise ne, tesẽ u kaplãn nkãy ke cĩĩnde yrã wãã nawee kẽ. Tuu pye kãntraha na, wo ba naa u yẽ kaplãn luhu, wo naa u yãã yĩĩnde ne, wo sẽ u yãŋ naa n yai ye, ma sya naa koho te u na.

² Woo kẽ u cĩĩnde yrã wããfua. Wo u yãã yĩĩnde ne, koo kẽ wo u wĩĩ pãã ye ye. Woo kẽ u pye Yãhã tãy, ma pa cĩĩnde yrã ne, lii wãkuayãã wee le na ye.

³ Woo wii too yãã yĩĩnde ne, ma u yẽ kaplãn luhu, wo u wĩĩ yar ye na. Wo n traha ye seefar le wo ne. Ye sẽ yãã, wii seefar le Yãhã ne, tesẽ ke Dya Yesu Crise ne, ke syi ne ye ga nii wo wãŋ syi dyaŋ.

⁴ Wo kai- ngĩĩ yrũhũ n yar ye na, le ma wo ye nuhungbãn.

Yesu kãnde wãyãr cãã- wo

⁵ Yesu tuu wo klaha lii ne, le nde, waa le yar ye na. Yãhã ma cãã-, wam wee yãã ke na ye.

⁶ Wo ma yee wo seefar le Yãhã ne, ma -sẽ maha n yãr wam wo, wo sẽ laha ye. Wo ma kawarfuafa, wo sẽ cĩĩnde ke ye.

⁷ Yãhã ke -sẽ ma cãã- wo, wo ma -sẽ n yãr ke cãã- wo, wo wãã le wii ne. Yãhã Dya Yesu ntãŋ

mpây pe woo, pe wo kapee- bye yee laha n kãã wo yĩŋ na gbeḡbe.

⁸ Wo ma yee wo sê kapee laa ge pye yãã ye, wo plaha wii ya, cĩinde wee wo wĩĩ laa na ye.

⁹ Kapee- nkãy too pye, wo ma -sê ke pãã yi Yãhã ye, ke ga tyii wo kapee- foho na ke kuãŋ ne. Āwã, Yãhã yee, ke ga wo kapee- bye yee laha kãã wo yĩŋ na. Yãhã sron, ke sê dur n yi ke kapãn kur ye ye.

¹⁰ Wo ma -sê yee wo sê kapee- pye ye, wo Yãhã ta kawarfuafua, ke kapãn sê nii gbãã wo laam wo ye.

2

¹ Waa u pii ne, n kai- ngĩĩ yrũhũ n yar ye na, ye ma syi ye ba naa kapee- pye ye. Wii ma -sê kapee pye, koholefua ma, u sê kapee pye yãã ye, u ga ba dye ye kue ye u Yãhã syii ye kē. Woo kē Yesu Crise ne, woo wii u sron.

² U ba ku mpar draha wo wo kapee- wãpye wĩĩ na. Loo n ta, Yãhã n ga wo wãnar sya wo ye wo kapee- wãpye wĩĩ na. N sê yee wii ya kapee- ye, nawee- kur bye kapee-.

Wii u seefar le Yãhã ne

³ Kãnde lii Yãhã le ta, wo ma le katan yãr, wo ga cã wo ma Yãhã ne.

⁴ Wii ma yee woo ma Yãhã ne, u sê -sê le kãnde katan yãr ye, woofua ma kawarfuafua. U Yãhã cĩinde fla sye.

⁵ Wii u -sê Yãhã laam wĩĩ pye, Yãhã wĩĩ sron n tãy woofua ye cĩinde. Wo laam wo, nawee tuu

ga waha pye mii u cã u seefar le Yãhã ne, loo ne nde:

⁶ Wii ma yee woo seefar le Yãhã ne, u yai u naa u troho tãhã Yesu yor wo.

Yãhã kãnde katanfuẽ

⁷ Naambiyãbuam, lii tẽ ga yrũhũ yar ye na, Yãhã kãnde katanfuẽ laa sã ne ye; katan lii le bii cãã yar ye na, loo ne. Loo katandyaha nde kapãn laa ne; ye le luhu yãã:

⁸ Le ma katandyaha, ma maha ma katanfuẽ. Lii le ta le n nii katanfuẽ le nde: Yesu Crise u troho tãhã le wo, ye bye ne. Ye sã yãã, wam ter n kãã, le Yesu Crise cĩnde cãã- n nii n yehe wo kẽ.

⁹ Wii ma yee woo u troho tãhã ke cãã- na, ma -sã tyii u nampyeŋ wĩ n fũhũ u ye, ufua ma wam wo nantãŋ.

¹⁰ Wii nampyeŋ ntãŋ ma dye u tãy, ufua ma cãã- wo. Waa ter saha kapee wãpyeŋ yãŋ gbe woofua pyer na ye.

¹¹ Wii ma -sã tyii u nampyeŋ wĩ n fũhũ u ye, ufua ma wam wo, u u troho tãhã wam wo, u sã u ya kakue cã ye, pe wam u ta u n nii fũũ wãŋ syi dyaŋ.

Driyẽ wũhũ, Yãhã wũhũ ne

¹² Waa u pii ne,
n saba nwo yrũhũ ye kẽ, ye le cã ye yee,
ye kapee- yee laha kãã wa
ye yĩŋ na gbegbe Yesu kãmay na.

¹³ Yii mpãy tee ma wãle,
n saba nwo yrũhũ ye kẽ, ye cã ye yee,
wii tuu pye ke kai- bye fegbeyale wo,

ye u wĩ cā yigi.

Yii mpāy tee ma naanfām,

n saba nwo yrūhū ye kē, ye cā ye yee,

Setane wii u ma sāndāpee yīnfua, ye u yia.

¹⁴ Waa u pii ne,

n saba nwo yrūhū ye kē, ye cā ye yee,

ye wo Tuhufua Yāhā wĩ cā yigi.

Yii mpāy tee ma wāle,

n saba nwo yrūhū ye kē, ye cā ye yee,

wii tuu pye ke kai- bye fegbeyale wo,

ye u wĩ cā yigi.

Yii mpāy tee ma naanfām,

n saba nwo yrūhū ye kē, ye cā ye yee,

laam ma ye ye Yāhā wūhū kue ye.

Ye Yāhā kapān sya le yaha ye laam wo,

ye maha sāndāpee yīnfua yia.

¹⁵ Ye ma syi ye taha kuae driyē wūhū na ye faha Yāhā yaha ye. Ye ma syi ye yīnde n yi too driyē ngaa na ye. Driyē wĩ ma n tāy wii ye, wo Tuhufua Yāhā wĩ saha tāy ufua ye ye.

¹⁶ Driyē wān nde bye nde: Kapee- nkāy bye nawee tuu ga n yigi u laam wo, tesē yīnde wĩ ne, ma suhu yataŋ ne wale wān kue ye, too nde sē n yir Yāhā fla na ye, te n yir driyē nge goo laam wo.

¹⁷ Ke driyē -sē nge, ke n pai kua kã ke wān ne te yīnde yigi nawee- kē. Mboo nawee, ma'a -sē Yāhā laam wĩ pye, maa cīnde yrā yāā Yāhā Yai wo, wākuayāā wee loo na ye.

Wii u ma kawar Crise

¹⁸ Waa u pii ne, ke driyē kuayale nɔ wa. Ye le luhu yāā, u kawar Crise yai u yi ke driyē kuayale

wo. Yagaa, nawee- mpāy ma wa, pe nihi. Wo ga waha poo mii bya yee kawar Crise. Mboo wii ma koo fla yāŋ, maa cā ke driyē kuayale nɔ gbe taha.

¹⁹ Poo nawee- mii, pe yi wo nklāŋ wo, pe laam sē -sē pye wo wāŋ ne wācɛŋ ye. Pe laam ma ne pye wo wāŋ ne wācɛŋ, pe ne ga kuee wo ne. Pe pe ya cɛr yi wo nklāŋ wo, wo sē le cā laha la yagaa ma yee, pe sē pye wo ne cīinde ye?

²⁰ Yii poo na, Yāhā gii ke laha ke kānkai- byɛ wo, ke Yāhā Yrā le ye laam wo, koo kē ye n Yāhā cīinde cā.

²¹ Ya'a yāā, tē saba nwo yrūhū ye kē, le sē nii mii, ye sē le Yāhā cīinde cā ye. Ye Yāhā cīinde cā, ye maha cā ma yee, kawar sē n yi cīinde wo ye, loo ne ta n u saba yrūhū ye kē.

²² Nawee wii syi -sē kē u ma kawarfuafua? Woo kē wii ne u n yee, a Yesu sē kē u Yāhā Yīndefua Crise ne ye. Woo kē u ma u kawar Crise, u wo Tuhufua Yāhā wīi sye, ma maha ke Dya sye taha le na.

²³ Ye cā ma yee, wii ma Yāhā Dya sye, u Yāhā bya sye. Wii ma le sya u laam wo, ma maha le pāā nawee- yīnde na ma yee, Yāhā Dya kē Yesu ne, ufua ma Yāhā bya ne.

²⁴ Loo ne, yii, Yāhā kaplāŋ nkāy tee cāā luhu, -ye ke le yaha ye laam wo! Koo ngīi ma kuee yai ye laam wo, yaa nii loho saa naa n yi ye nsoho wo, Yāhā Dya ne tesē Yāhā ne ye.

²⁵ Yāhā Dya tuu -sē yee woo ga ba ngii wāā wo kē, koo kē cīinde yrā ne, lii wākuayāā wee le na ye.

²⁶ Mpāy pe n ke pe ye wlāhā le pe kāmpee wo, n kaplāŋ ngīi yrūhū ye kē poo wīi na.

²⁷ Yii poo na, Yesu Yāhā Yrā le ye laam wo, le n kuee yai ye laam wo. Yāhā Yrā le -sē ma ye laam wo, ye maha yai la, ye naa waa ter kaklaha luhu? Aye rēhē! Ye cā Yāhā Yrā ne, le ye klaha kai- byē ne. Cīinde wūhū ya le ye klaha, kawar wūhū sē kē ye. Loo na, ye nii loho ma n naa n yi ye nsoho wo Yesu ne ye, mii Yāhā Yrā le ye klaha le ne mii.

Yoo syi u ma Yāhā puee?

²⁸ Āwā, waa u pii ne, ye nii loho ma n naa n yi ye nsoho wo Yesu ne ye! Wo ma nii loo pye, Yesu ma ba fe gbe yi per gii, wo laam ga ba tege nii tee nen wo, fyar saa ba wo yigi u yīnde na ye.

²⁹ Tee cā u Yesu Crise sroŋ, u sē kapee pye yāā ye, ye yai ye maha cā ye yee, nawee wii kānde ma sroŋ, Yāhā puee kē woo ne.

3

¹ Ye cā wo wī le n tāy wo Tuhufua Yāhā ye mii, wo ntāŋ sroŋ dye ter ke tāy, ke n sya wo yee ke pii. Cīinde ne, Yāhā pii me wo ne. Nawee- byē sē le cā ye. Ya'a yāā, mpāy sē wo yāŋ Yāhā pii ye, -ye cā ye yee, pe sē cāā wo Tuhufua Yāhā cā ye, koo kē.

² Naambiyām, nanga nge na, Yāhā pii me wo ne. Too -sē ga ba nii ngii sukūhū gaa laam wo, waa sē loo cā wa ye. Too lii ya cā, loo ne nde: U Yesu Crise ma ba dur ba, waa nii u wāŋ syi dyaŋ, wo ba u sroŋ yāā yīnde ne.

³ Wii u koho taha yaha u Yesu wāpaŋ na ke syi, u u laam gbihi n ta yalebyē, pe n yō mii Yesu laam dyaŋ.

⁴ Mboo wii ma dye kuee kapee- wāpyeŋ wo, ma wee yĩmbui nen na Yāhā ne ye, kānde lii Yāhā le ta, ma loo sye. Ma sē yāā, kānde lii Yāhā le ta, le wāsyen ma kapee.

⁵ Ye cā Yesu woo wii u sē kapee pye yāā ye, u pa maa wo kapee- yee laha kāā wo na.

⁶ Loo na, wii ma nii loho sē n yi pe nsoho wo Yesu ne ye, ufua saa naa kapee- pye nantāŋ ye. Wii ma -sē nii kapee- pye, ufua sē Yesu cā cūnde ye, u sē maha u wĩ war ye.

⁷ Waa u pii ne, ye ma syi waa n ba ye wlan u ye le u kāmpee wo ye! Wii ma kasroŋ pye, woo gε sroŋ mii Yesu wāŋ syi dyaŋ.

⁸ Wii ma nii kapee- pye, sāndāpee yĩŋfua Setane puee kē ufua ne. Ye sē yāā, u sāndāpee yĩŋfua yir ma nii kapee- fla ya pye. Yāhā Dya -sē pa u n pai u sāndāpee yĩŋfua tēmpee pye klaha-tāŋ.

⁹ Wii Yāhā u ta u n dur see laanfāyōm ne, u saa naa kapee- pye ye. Ma sē yāā, ma'a dur see laanfāyōm ne, fānga gii Yāhā Yrā ke wāā ma kē, ke ga kuee yai tāŋ ma laam wo. Yāhā ke ma ma Tuhufua, ma saa naa kapee- pye ye.

¹⁰ Lii le Yāhā pii war n yi sāndāpee yĩŋfua pii ne, loo ne nde: Wii ma yee u sē kasroŋ pye ye, tesē u nampyeŋ wĩ sē maha n tāy u ye ye, Yāhā puee sē kē usyifua ne ye.

Ye tyii ye ntāŋ n naa n dye yii tāy!

¹¹ Yāhā kapān lii tee cāā luhu loo ne nde: Ye tyii ye ntāŋ n naa n dye yii tāy!

¹² Ye sē yāā, faalefa Kayē bii u ya ta sāndāpee yĩŋfua puee, ma u cīifua gbā boo. Wo ma syi wo

nii Kayě wāŋ syi dyaŋ ye. Nwa ta u n bii u cīŋfua gbā boo? Kayě pyer bii pee. U cīŋfua woo pyer -sē bii yō.

¹³ Wo nna, ya'a yāã driyě ngefa pe ye laha, ye ma syi le n ye fe gbe ye!

¹⁴ Wo cā ma yee, yagaa wo sē maha wee mii wo ku ye, wo ma cīnde yrāŋ na Yāhā yīnde na. Ya'a yāã too le pāã ke syi, wo nampyeŋ- ntāŋ me pe dye wo tāy, loo ne. Wii ma yee u nampyeŋ ntāŋ sē dye u tāy ye, u maha ma mii u ku Yāhā yīnde na.

¹⁵ Wii ma u nampyeŋ- laha, naboofua kē u ne. Ye le cā, cīnde yrā lii wākuayāã wee le na ye, le wee usyifua ye ye.

¹⁶ Ye sē yāã, Yesu tuu wo gbā sya ma ku, koo syi kē pe n yee, nawee ntāŋ sroŋ dye u nampyeŋ tāy cīnde. Loo ne, Yesu tuu yar wo na ke syi, wo bya yai wo yāŋ Yesu na. Wo sē wee yrāŋ na wii ya wīi na ye, wo ma yrāŋ na wo nampyeŋ- wīi na.

¹⁷ Mboo walefua, taa ma nampyeŋ yāã fen laam wo, ma'a yīmpɛ tyīn tā u fen na, maa waha yee la, Yāhā ntāŋ dye ma tāy?

¹⁸ Waa u pii ne, ye sē yāã, ma'a yee ma nampyeŋ ntāŋ dye ma tāy, pe sē yee ma naa le pāã yě ya ne ye. Ma'a ma nampyeŋ yāã fen wo, maa waha yia lii na, le pye u kē, u n cā u ntāŋ dye ma tāy cīnde.

¹⁹ Wo ma nii loo pye, waa cā wo ma Yāhā ne cīnde. Wo ma nii loo pye, wo laam ga tege nii tee nen wo, wa'a n pāã Yāhā ne.

²⁰ Wo laam ma sya n wlāhā wo kapee- wāpye wīi na, wo yai wo cā wo yee, Yāhā ter wo laam

wāwlāhā wīl yaha, ma maha kai- bye cā wo na.

²¹ Naambiyām, loo na, wo laam ma yee pe sē n wlāhā ye, wo laam ga tege nii tee nen wo, wo n waha pāā Yāhā ne.

²² Wa'a lii nar ke ye, ke ga le kai pye wo kē. Wo ke kānde katan yār ma maha n luhu ke ye. Lii le n tāy ke ye, loo ya too n pye; koo kē ke -sē ne le kai pye wo kē.

²³ Ke yee ke kānde lii ta, wo naa le yār le nde: -Too ke Dya Yesu ta wo Yater, too tyii wo ntān naa n dye wii tāy mii Yesu wo yar le ne mii.

²⁴ Kānde lii Yāhā le ta, wii ma le katan gbihi yigi klue sīi ne, ufua ma Yāhā ne, Yāhā bya ma ufua ne, loho saa waha naa n yi pe nsoho wo ye. Wo -sē ga waha pye mii wo cā wo yee, Yāhā ma wo ne? Yāhā Yrā lii le ma wo laam wo, loo le wo ta wo n le cā.

4

Yāhā laam wīl pyefa tesē ke napīl laam wīl pyefa ne

¹ Naambiyām, mpāy bye pe n yee, a Yāhā Yrā ma poo laam wo, ye ma n cāā le sya pe ye cīnde ye! -Ye pe naha yān, ke ma pye Yāhā Yrā ma pe laam wo cīnde. Ya'a yāā tē ye yar le ne, kawarfa mpāy pe pe ya yee Yāhā kaplān tōrfa, pe tee mii pe yi driyē nge tebehe bye wo, ma sya nihi ter.

² Tee ga pye mii ye waha naa n cā Yāhā Yrā ma pe laam wo, le nde: Wii u nawee- yar ma yee, Yāhā Dya Yesu woo kē, u see ba wo ye nawee, ye ga cā Yāhā Yrā ma woofua laam wo.

³ Wii ma -sê loo sye, ye ga cã Yãhã Yrã wee woofua laam wo ye. U kawar Crise laam ter pe ma u ye. Ye u kawar Crise wãpa wĩ luhu driyẽ wo. Tee -sê cã yagaa, u pa wa.

⁴ Waa u pii ne, yii mpãy tee ma Yãhã wãm, ye yia pe kawarfuafa mpãy na pe pe ya yee Yãhã kaplãn tõrfa; pe sê waha ye wlãhã, ma ye le pe kãmpee wo ye. Ya'a yãã ye waha yia pe na, ye cã Yãhã Yrã ma ye laam wo, koo kẽ. Loo fãnga ter fãnga gii yaha ke ma poo laam wo.

⁵ Poo me mpãy syi ne pe sê Yãhã cã ye, driyẽ nge pii me poo ter mii ne. Koo kẽ pe n nii driyẽ nge ya yor pãã, driyẽ difa n nii n luhu pe ye.

⁶ Wii poo na, Yãhã pii me wo ne. Wii ma Yãhã wĩ cã yigi, woosyfua wo kaplãn luhu. Wii ma yee u wee Yãhã ne ye, usyfua saa naa n luhu wo kaplãn ye ye. Mpãy pe ma cĩnde Yrã ne pe laam wo, tesê mpãy ne pe kawar wĩ yigi yaha pe ya laam wo, waa waha naa pe war koo syi.

Wo ntãŋ wãdye Yãhã tãy

⁷ -Too tyii wo ntãŋ n naa n dye wii tãy! Ye sê yãã, nawee- ntãŋ wãdye wĩ pe ya tãy, Yãhã kẽ ke n pai loo nde ne. Wii nampyeŋ ntãŋ ma dye u tãy tesê Yãhã ntãŋ ne, Yãhã puee kẽ ufua ne, Yãhã ma u ne.

⁸ Wii ma waa ntãŋ wãdye wĩ sye u ya tãy, ufua wee Yãhã ne ye; Yãhã koo -sê ma nawee- wãyõŋ wĩ na.

⁹ Wo ntãŋ dye Yãhã tãy, ke n le yar wo na mii, le nde: Ke ke Dyapuai nen ya nɔ wãã kãntraha na, ma yee too ba cĩnde yrã yãã u Dya kãmay na, lii wãkuayãã wee le na ye.

10 Poo ntāṅ wādye wīl ne nde: Yāhā ntāṅ sē me pe dye wo tāy ye, wo ntāṅ poo me pe dye Yāhā tāy. Loo ne ke n ke Dya nɔ wāā u n ba ku mpar draha wo, ma wo kapee- gbe kāā wo yīṅ na.

11 Naambiyām, le ma pye wo ntāṅ dye Yāhā tāy koo syi, wo bya wo yai wo ntāṅ naa n dye wii tāy.

12 Waa sē Yāhā yāā yāā yīnde ne ye. Wo ntāṅ ma -sē dye wii tāy, nawee- bye ga le yāā gbaa na pe yee, Yāhā ke niisaha ta wo laam wo, pe maha ke ntāṅ wādye ter yāā wo ye.

13 Yāhā ke Yrā wāā wo kē. Loo ne wo ma Yāhā ne, Yāhā bya ma wo ne, loho sē waha n yi wo nsoho wo ke ne ye.

14 Wo Tuhufua Yāhā ke Dya nɔ wāā, u ba nii driyēfa Syayahafua. Wii poo na, wo le yāā yīnde ne, koo kē wo n nii le pāā nawee- bye ye, pe n le cā pe ya ndoṅ.

15 Wii ma yee u sē le wūhū ye, ma le pāā nawee- ye ma n yee, Yesu ma Yāhā Dya, Yāhā ma woosyifua nwo ne, woosyifua bya ma Yāhā ne, loho sē waha n yi pe nsoho wo ye.

16 Wii poo na, wo le war ma le cā, wo ntāṅ sronṅ dye Yāhā tāy, wo koho taha yaha loo nde na.

Yāhā ma nawee wāyōṅ wīl na. Wii u ntāṅ wādye wīl ke, ufua ma Yāhā ne, Yāhā bya ma ufua ne, loho sē waha n yi pe nsoho wo ke ne ye.

17 Wo ntāṅ dye Yāhā tāy. Loo nde ma wo ta Yāhā bye ntāṅ n dye wo tāy, tesē wo nampyenṅ ntāṅ ne, wo ga nii mii Yesu wāṅ ter syi dyanṅ. Yāhā laam wīl ne loo nde ne. Le ma nii ke syi, kasāhā per ma ba nɔ, wo laam ga tege nii tee nen wo.

18 Wãfya wĩ ma suhu ntãŋ wãdye wĩ ne, ke sê wãã le ye. Ma sê yãã, ma'a fya per gii, ma cã ma yee, ma kapee- foho ma ma yĩŋ na nantãŋ. Ma'a yãã raa fya kuee, ma le cã ma sê le sya cĩnde, ma ntãŋ dye Yãhã tãy ye, Yãhã bya ntãŋ sê maha dye ma tãy ye.

19 Wo ntãŋ poo me pe cãã dye Yãhã tãy, koo syi kē, Yãhã ntãŋ n dye wo tãy, tesē wo nampyen-ntãŋ ne.

20 Wii ma yee Yãhã ntãŋ dye woo tãy, ma -sē u nampyen laha, ufua ma kawarfuafua. Ye sē yãã, u nampyen wii tuu n yãã yĩnde ne, u ma yee woo ntãŋ sē dye u tãy ye, Yãhã gii tuu sē -sē yãã ye, u ga waha pye mii u yee, ke ntãŋ dye woo tãy?

21 Yãhã ke bii lii yar wo na ke kãnde na, le nde: Yãhã ntãŋ ma dye wii tãy, ufua yai u tyii u nampyen ntãŋ bya n dye u tãy.

5

Driyē wũhũ saa waha yia wo na ye

1 Nawee wii woo ma le sya wa cĩnde ma yee, Yãhã Yĩndefua kē Yesu ne, ufua ma Yãhã puee. Wii ma yee Tuhufua Yãhã ntãŋ dye u tãy, ufua yai ke pii bya ntãŋ n dye u tãy.

2 Too ga waha pye mii, wo cã Yãhã pii ntãŋ dye wo tãy, le nde: Ke ma pye Yãhã ntãŋ dye wo tãy, tesē ke kãnde lii ta, wo ma le katan bye yãr, waa cã Yãhã pii ntãŋ dye wo tãy.

3 Ye sē yãã, Yãhã ntãŋ wãdye wo tãy, loo ne, wo naa ke kãnde katan yãr. Ke kãnde katan wãyãr saa kai kua wo ye ye.

⁴ Ye sê yãã, wii woo tuu ma wa Yãhã puee, driyẽ wũhũ saha yia usyifua na ye. Wa'a Yesu ta wo Yater, loo fãnga ga waha wo ta, wo n yia driyẽ wũhũ na.

⁵ Nawee wii ter syi ga waha yia driyẽ nge wũhũ na? Wii tuu le sya cĩnde ma yee, Yãhã Dya kẽ Yesu ne, woosyifua ga waha yia ke na.

Cĩnde lii le yar wo na Yesu Crise wĩ na

⁶ Yesu Crise kẽ wii ne tuu pa driyẽ wo. U pa pe n ba u tãã yi loho wo, u n maha ba u ntãŋ woo wo wĩ na. U sê pa ma ba dye loho ya wo ye; u pa maa dye loho wo, ma maha ba u ntãŋ woo taha le na. Wo laam wo, Yãhã Yrã wo yar ma yee, cĩnde ne le ne. Yãhã Yrã ne le cĩnde ya pãã wo ye.

⁷ Kate- tãã wo yar Yesu ma Yãhã Dya, cĩnde.

⁸ Koo kate- kẽ ngĩ: Yãhã Yrã tesẽ loho ne tesẽ ntãŋ ne. Ke kate- tãã ngĩ bye ke yĩŋ ma neŋ.

⁹ Nawee ma yee woo lii yãã yĩnde ne ma ba wo yar, wo sê ne le sya la cĩnde? Yãhã ke -sê wo yar lii ne, loo wee la cĩnde ma ta ter? Koo sê na, ke ke Dya wĩ yar wo na?

¹⁰ Loo nde na, wii ma Yãhã Dya ta u Yater, ufua le cã laha u laam wo ma yee, Yãhã ke wo yar lii ne ke Dya wĩ na, cĩnde ne le ne. Wii ma -sê yee u sê Yãhã Dya ta u Yater ye, Yãhã ke wo yar lii ne ke Dya wĩ na, u sê le sya cĩnde ye. Ke nii mii ufua Yãhã ta kawarfuafua.

¹¹ Yãhã ke wo yar lii ne ke Dya wĩ na, loo ne nde: Yãhã cĩnde yrã ta wo myaha na, lii wãkuayãã wee le na ye. Wo -sê ga waha loo cĩnde yrã yãã ke Dya kãmay na.

12 Yāhā Dya wīl ma pye wii laam wo, ufua ga waha loo cīnde yrā yāā. Wii ma -sē yee, ke Dya wīl wee u laam wo ye, ufua saha loo cīnde yrā yāā ye.

Yāhā pii laam tege nii tee nen wo

13 N kaplāŋ ngīl yrūhū ye kē, ye n waha cā cīnde yrā ma ye ye, lii wākuayāā wee le na ye, yii mpāy tee Yāhā Dya ta ye Yater.

14 Wa'a n pāā Yāhā ne, wo laam ne tege nii tee nen wo. Nwa ta? Wo ma lii nar Yāhā ye, le kai ma pye ke laam wīl, ke ga wo wānar luhu, koo kē.

15 Wo ma -sē cā, ke ne wo wānar luhu, wo cā ma yee, wa'a ngii ngii nar, ke ne le kai pye wa wo kē.

16 Wii ma u Yesu kāndeyārwe yāā tuu kapee laa pye, kapee lii le sē u cer cīnde yrā na u kuāŋ ne ye, ufua n Yāhā nar u kē, Yāhā n cīnde yrā wāā u kē, lii wākuayāā wee le na ye. Mpāy kapee- ke sē pe cer cīnde yrā na pe kuāŋ ne ye, poo wīl ne tē n pāā. Ma -sē yee wii na, u kapee u cer kāā cīnde yrā na u kuāŋ ne, n sē yee ye Yāhā nar u kē ye. Ye yai ye cā kapee laa ma, le nawee cer n kāā cīnde yrā na u kuāŋ ne.

17 Kai- nkāy bye ke sē sroŋ ye, kapee- kē Yāhā yīnde na. Kapee- nkāy -sē ma, ke sē nawee cer n kāā cīnde yrā na ye, lii wākuayāā wee le na ye.

18 Wii ma nii wa Yāhā puee, u saha kuee naa kapee- pye ye. Yāhā Dya n sēŋ ufua na, koo kē. Ke syi ne, sāndāpee yīnfua Setane saha laa pye u na ye.

¹⁹ Driyěfa byε ma sya yee pe wee Yāhā pii ye, ma nii sāndāpee yīŋfua koho wo, wii poo na wo cā ma yee, wo ma Yāhā wām.

²⁰ Wo cā Yāhā Dya pa, ma ba cāā- le wo laam wo, wo n waha Yāhā cā koo gii ke ma cīinde. Wo wāā le wo Tuhufua Yāhā ne ke Dya Yesu Crise kāmāy na. Ye sē yāā, Yesu woo kē u ma cīinde Yāhā, ma maha ma cīinde yrā, lii wākuayāā wee le na ye.

²¹ Waa u pii ne, ye ma syi ye naa mpar wān yāŋ Yāhā ye! Te saha nii Yāhā ye.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 18 Apr 2025 from source
files dated 29 Jan 2022

15120496-00e2-503a-8d40-2d7cfdc1ba5b